

«Mia via dalla crusch»

«Ex-voto» regalau e deponius da Linus Flepp ella caplutta da Puntreis a Mustér

DA GIUSEP CAPAUL/FMR

■ «Ex-voto» deriva dil latin e munta: pervia dad haver fatg in vut ed ei in regord picturau. Ei setracta dad ina donaziun simbolica tenor ina empermischun per guariziun u salvament cun agid da sura tier grondas, grevas e riscadas intervenziuns chirurgicas, nua ch'ei va savens per veta u mort. Deponi vegnan «ex-votos» en in liug sogn, pil pli en ina baselgia da peleginadi tier Nossadunna. Sigl «ex-voto» vegn malegiu e descet cuort la situaziun da disletg u malsogna, rugau ed engraziu per esser vegnius sauns cun era metter sutvi il num dil regalader ed il datum, cu tut ei iu ora en bein.

Ina fuorma tut speciala per «ex-votos» ein la Via dalla crusch e passiu da Cristus. Era il pictur-artist, *Linus Flepp*, Mustér, ha creau siu «ex-voto» sco «Mia» via dalla crusch e deponiu quel cun lubientscha dalla Fundaziun-casa ella caplutta dil center da sanadad Puntreis a Mustér. Mirar, considerar e meditar Cristus plein plagas e saung vid la crusch deva il temps baroc al grev malsau speranza, consolaziun e confiert divin. Era tier Linus Flepp ei l'empermischun daventada sco «ex-voto» segn da grond engraziament, che la cumplacada e riscusa transplantaziun urgenta d'in organ ei reussida.

La transplantaziun spindronta – ina riscada intervenziun vid in'arteria memia grossa era precedida gia il settember 2019 – ei succedida ils 23 da schaner 2020 sco ch'igl organ ton spitgau e desiderau da



Las siat tablas dalla Via dalla crusch en caplutta Puntreis (da sen.) 1. Las travs; 2. La fatscha; 3. La lescha; 4. Il sudari; 5. Las guotas; 6. Il passadi; 7. La cumplenida. FOTOS CECILE SCHUOLER

transplantar era arrivaus e steva a disposiziun, schenghegiu d'ina persuna nunenconuschenta. Miedis-specialists dil Spital universitar a Turitg han implantau igl organ. Quei temps dad immensas dolurs e spetga prest desperada sill'operaziun ei staus per Linus Flepp ina vera via dalla crusch, ina gronda tortura, plein tema, anguoscha e fetgas nundescriviblas, essend ch'ei mava la finala per veta e mort.

Linus Flepp di ch'el hagi giu trasatras speranza nunballuconta e bia cardientscha, schizun en ina miracla, da puspei saver levar si e ver la grazia e cuida da nova veta regalada. Ei seigi stau in sgarscheivel mument e sentiment nundefinibel dad esser exponius e surdaus a resca e malsegirtad denter veta e mort. Tgei e co quei seigi propi stau, sappi mo el sco pertuccau. El ei denton staus perschuadius, ed ha era cartiu, che sia via dalla crusch meini tras la transplantaziun, grazia al donatur digl organ e muort las cumpetenzas e gronda

savida dils miedis-specialists dil Spital universitar a Turitg, a success vital.

Linus Flepp ha reduciu siu «ex-voto» sin siat staziuns (dallas 14 staziuns usitadas dalla via dalla crusch). Sia presentaziun coincidescha tscheu e leu tematicamein cun la Via crucis da Cristus. El nushegl ei denton ton sco tut stau centrau tras vuli accents e sentiments persunals sin la via dalla crusch sui generis, pia sin quella ch'igl autur digl ex-voto ha sez giu da far atras.

Siu «ex-voto» persunal ei buca igl emperem da quei gener che deriva da Linus Flepp. Dapi decennis procura igl artist da Medel a Mustér per «ex-votos» sin giavisch da singuls e famiglias. Quels sesanflan ella baselgia da Nossadunna sin Claustera a Mustér – sper biars auters. La lubientscha dad astgar far ed exponer leu quellas tablas votivas dat mingamai igl avat dalla claustra. Ils «ex-votos» da Linus Flepp a Mustér sedistinguan tuts tras siu tipic stil direct che reducescha maletg e text sil minimum.

La crusch – speranza e salvament

La Via dalla crusch, igl «ex-voto» da Linus Flepp, lai percorscher centralmein, impressiunontamein e claramein quei e con che ha fatschentau e mudergiu el en connex cun l'operaziun spindronta dalla transplantaziun. Sia via crucis ensiara denton era elements, expressiuns e simbols encuraschonts e confortonts che han schau surmuntar bein ina dramatica intervenziun operativa per el – sco cartent – era cun agid e sefidond sin Diu.

Igl «ex-voto» da Linus Flepp ei artistcamein en sia davosa consequenza perdetga veseivla e perschuadenta che la via dalla crusch percurrida dad el persunalmein e cunscientamein en dolor e speranza ha menau a nova veta. Tgei gronda cuida ch'el ha giu e tgei significativ regal ch'el ha la finala retschert. Igl ei perquei ludeivel che quella atgnamein gronda miracla ei vegnida perpetnisada da Linus Flepp en in bi, edificont, tschaffont, encuraschont e con-

solont «ex-voto» e plazzaus en in spazi sacral, nua ch'el s'auda era.

A caschun dalla messa da gievgia vargada en caplutta da Puntreis ha il plevon, sur *Mathew Kurian*, Mustér, benedi in igl «ex-voto» «Mia via dalla crusch» digl autur, regalader e pictur-artist Linus Flepp che ha lu declarau l'ovra.

